


TEZĂUR LITURGIC

25 IANUARIE

**ACATISTUL
SF. CUVIOASE-MUCENIȚE
ATANASIA,
EVDOCHIA,
MAGDALENA
ȘI MARIA
DE LA ZOSIMOV**



MOSCOVA, 2000



Акафист

преподобномученицам

Зосимовой пустыни

Кондак 1

Избранныя святые и угодницы Господни, преподобныя матери Афанасие и Евдокие, Магдалино и Марие, присныя о душах наших молитвенницы, благодарственные песнопения приносим вам, величающе прославльшаго вы Господа воспеваем вам песнопения похвальные. Вы же предстательством вашим от всяких бед нас свободите и наследницы Царствия Божия нас сотворите, да величаем вас сие: Радуйтесь, святые и прехвальныя преподобномученицы Зосимовския, в вере и благочестии возрастати нам помогающия!

Икос 1

Ангельскою любовью Христа возлюбившия, преподобныя мученицы Афанасие и Евдокие, Магдалино и Марие, от юности вашей чистую совесть к Богу стяжавшия, крест изгнаний, страданий и лишений добровольно прияли есте, вечной истины Христовой ради; в богообщении, благости и чистоте пожившия, житие ваше благоугодное с неземною радостью в образ подражания нам оставившия, и ныне во славе

пред престолом Агнца Божественного
предстоите и молитесь о нас, с верою, надеждою
и любовью воспевающих вам сице:
Радуйтесь, очи духовныя нам всем
отверзающия;
Радуйтесь, любить всех любовью Христовою
научающия;
Радуйтесь, от бед и невзгод нас всех
ограждающия;
Радуйтесь, страх смерти и болезни в душах
наших побеждающия;
Радуйтесь, благодатную силу исцеления
просящим подающия;
Радуйтесь, от проказы греховныя нас
избавляющия;
Радуйтесь, утешение благое в сердца
низпосылающия;
Радуйтесь, упование на милосердие Божие
благодатно вселяющия;
Радуйтесь, святые и прехвальныя
преподобномученицы Зосимовския, в вере и
благочестии возрастати нам помогающия!

Кондак 2

Видя, богоносная мати, во святом крещении
Алекسانдрою нареченная, теплую любовь твою
ко Господу и служению истинному Богу, во
обители, благочестивыма и премудрыма
прародители и сродниками твоима

благоустроенней и благоукрашенной,
пострижение с именем Афанасия прияла еси и
усердно подвизалася еси в посте и преусердном
делании молитвенном, и сего ради благодать в
очах Божиих обрела еси, воспевая укрепившему
тя Христу: Аллилуйя!

Икос 2

Разумом духовным и ведением Всеблагий
Господь просвети вас, всехвальныя Афанасие и
Евдокие, Магдалино и Марие, яко еще во дни
младости ваша узкий спасительный путь
избрали есте, и святых жен житию поревновали
есте, совершающе Единого Учителя
Божественныя заповеди. Ныне же во славе
вместе со ангелы и всем ликом преподобных
жен предстоя престолу Троицы Всесвятыя,
молите даровати нам разум и силу зрети и
побеждати страсти душевныя всем нам,
взывающим вам сице:
Радуйтесь, неложному и благоговейному
почитанию Бога научающия;
Радуйтесь, всех жаждущих спасения во Иисусе
Христе укрепляющия;
Радуйтесь, теплотою любви Божественныя
сердца наша оживотворяющия;
Радуйтесь, ум и сердце к горнему возводящия;
Радуйтесь, созерцати Бога Всевышнего нас
просвещающия;

Радуйтесь, растления душевного и совести
лукавства нас избавляющие;
Радуйтесь, воспевати величие Божие нас
научающие;
Радуйтесь, духовне бодрствовать и трезвиться
нас сподобляющие;
Радуйтесь, святые и прехвальныя
преподобномученицы Зосимовския, в вере и
благочестии возрастати нам помогающие!

Кондак 3

Сила благодати Божией обильно снизошла на тя,
богоносная мати наша Афанасие, яко ты во дни
гонений, богоборцами возвигнутых, игуменство
над преславною обителию Зосимовскою прияла
еси и попечение премудрое о многочисленных
насельницех и добрых христианах, окрест
живущих, явила еси, скорбную и тесную
шествовавше стезею, высотой добродетелей
душу твою Христу уневестила еси, со Христом
пострадавше с Ним воскреснув для жизни
вечной. Сице молим тя: избави нас от отчаяния
и малодушия, укрепи в преданности воле Благой
мольбами твоими ко Господу Иисусу, да
возможем и мы купно с тобою взывать Ему:
Аллилуйя!

Икос 3

Имеючи любовь Божественную в сердцах
ваших, прехвальные Афанасие и Евдокие, в
молитвенном делании, усердных трудах,
терпении неудобств житейских и просвещении
народа окрест сущего, пребывали есте,
бодренным оком ума вашего невидимого Бога
созерцали есте, богоблаженные матери наши.
Его же лицезрением ныне наслаждающиеся,
молите Иисуса Сладчайшего укрепить всех нас в
верности Ему и Святей Церкви Его и примите
похвалы сия:

Радуйтесь, к свету истины прельщенных
обращающия;

Радуйтесь, страх Божий в сердца вселяющия;

Радуйтесь, благоговети пред святыней
научающия;

Радуйтесь, ревностию ко спасению
воодушевляющия;

Радуйтесь, духовное нечувствие в нас
подавляющия;

Радуйтесь, храмы Божий почитати
внушающия;

Радуйтесь, в них отраду находить
вдохновляющия;

Радуйтесь, жажду Святого Причащения в нас
возбуждающия;

Радуйтесь, святые и прехвальные

преподобномученицы Зосимовския, в вере и благочестии возрастати нам помогающия!

Кондак 4

Бурю злых напастей, нестроений и искушений кротостию, молитвою и незлобием утишали есте, богомудрыя матери Афанасие и Евдокие, Магдалино и Марие, добродетельми христианскими, аки щитом, от стрел лукаваго защищали есте и советом святых отцев внимали есте, тем же прошедше весь путь многотруднаго иноческаго жития, подвигом мученичества той завершили есте е, и в обители небесныя вселилися есте, идеже купно со святыми и ангелы воспеваеете Господеви: Аллилуйя!

Икос 4

Слышавше и видевше богоугодное житие ваше, премногую любовь вашу к Богу и ревностное благочестивое иноческое житие, преподобномученицы святые, многие ближние и дальние приходиша к вам, поучалися есте наставлениями вашими к покаянию и исправлению жительства своего устремившеся, от грехов и страстей отвращающеся, в разум истинный прихождаху, отчаяния и скорби своя верою и надеждою на Милосердие Божие досточудно побеждаху; с ними же и мы, восхваляем вас, умиленно зовем:

Радуйтесь, любы нелицемерную в нас
воспламеняющая;
Радуйтесь, кротость и смирение в себе нам
показующая;
Радуйтесь, терпением и мужеством души наши
украшающая;
Радуйтесь, нас, алчущих и жаждущих правды,
насыщающая;
Радуйтесь, сердца наши благодатью Божиею,
вам данною, очищающая;
Радуйтесь, очи наши духовные к зрению Бога
изошряющая;.
Радуйтесь, вражды и ссоры наши
умиротворяющая;
Радуйтесь, всякий мрак заблуждения от нас
прогоняющая;
Радуйтесь, святые и прехвальныя
преподобномученицы Зосимовския, в вере и
благочестии возрастати нам помогающая!

Кондак 5

Боготечною звездою в обители Зосимовстей, а
послеже и в веси Алабинской, просияла еси,
преподобная мати Афанасие, яко процвела еси
чистым и непорочным твоим житием, трудами
иконописания и милосердия ко ближним твоим,
во инокинех же совершенными подвигами
твоима, за Христа пострадавше, и взошла еси во
Иерусалим Небесный, радующеся и веселящися,

яко добре совершивше течение твое в пределах степей Казахстанских, и ныне вопиеша Господеву: Аллилуйя!

Икос 5

Видяще вас, всехвальныя матери Афанасие и Евдокие, Магдалино и Марие, со мученики Христовыми сочетаемых и с ликами преподобных вчиняемых, с девственники ликующих, с постники и пустынники ублажаемых, яко с ним купно ныне непрестанно песнь хвалебную Троице Всесвятей возсылаете и молитесь о нас, вас пениями сими прославляющих:

Радуйтесь, ревнительницы веры и благочестия;
Радуйтесь, показавшия путь верного ко Христу восхождения;

Радуйтесь, благодать Святаго Духа во спасение стяжавшия;

Радуйтесь, радость молитвеннаго богообщения познавшия;

Радуйтесь, благие мысли и чувства в недоумении нам сущим внушающия;

Радуйтесь, к терпению бед, лишений и скорбей нас воодушевляющия;

Радуйтесь, святые желания и намерения ко спасению нашему в сердца нам влагающия;

Радуйтесь, добрыми плоды веры, надежды и любви души наша исполняющия;

Радуйтесь, святые и прехвальныя преподобномученицы Зосимовския, в вере и благочестии возрастати нам помогающия!

Кондак 6

Проповедница истинного благочестия и жития святого, преподобная мати Евдокие, и девства чистый сосуд елеем молитвы и любви наполнивше, любовь к игумении твоей движимая и долженствование монашеское исполнити до конца желая, пребыла с наставницею твоею до конца, претерпевши лютыя тяготы изгнания из земли Московския в пределы Казахстанския, тако бо неугасимый светильник в сердце своем возжгла еси, с ним же бодренно в сретение Небесного Жениха изшедше, взошла еси. Ныне водворяясь с сонмом Ангелов и святых, молися Христу Богу, части дев юродивых избавитися нам, да сподобимся вместе с тобою во веки веков Спасителю воспевати Алилуя!

Икос 6

Воссияли святостью подвигов ваших, матери досточудные, егда в годину гонений на святую Церковь от безбожной власти воздвигнутых, огнем веры крепкой, надежды несомненной и любви истинней, преподобные Афанасие и Евдокие, Магдалино и Марие, прослави убо вас

Господь, яко сбышася на вас словеса апостольския «сила Божия в немощи совершается», вы бо благодать Духа Всесвятаго восприяли есте и Его дарами ближним твоим с любовью послужили есте, в вере, надежде и любви богомудро их утверждая. И самих себе Агнцу Божию Христу Иисусу, в жертву всесожжения, самих себя принесли есте. Мы же, благодарно вопием вам:
Радуйтесь, с высоты небесной милостиво на нас, недостойных, призирающия;
Радуйтесь, похвалы наши, благосердне приемлющия;
Радуйтесь, молитвам нашим, с любовью внемлющия;
Радуйтесь, от всея души и сердца возносимая к вам прошения наша исполняющия;
Радуйтесь, во всех нуждах, бедах и обстояниях нам помогающия;
Радуйтесь, безвестныя и тайныя премудрости Божия нам открывающия;
Радуйтесь, светом вашим нашу тьму греховную разгоняющия;
Радуйтесь, теплотою любви вашей наша хладная сердца согревающия;
Радуйтесь, святые и прехвальныя преподобномученицы Зосимовския, в вере и благочестии возрастати нам помогающия!

Кондак 7

Желая воспевать Подвигоположника Христа, славно венчавшего вас, преподобномученицы, и достойно прославить подвиги исповедничества и труды благочестия, подъятые вами, всеблаженные Афанасие и Евдокие, Магдалино и Марие, любви ради Божественные, помозите нам свыше данною вам благодатью Духа Всевятаго Утешителя, сердца наша от греховныя тьмы очистити, дабы возмогли и мы купно с вами во веки Господеви воспевати: Аллилуйя!

Икос 7

Новый подвиг подъяли, прехвальные матери наши, егда в во время нашествия безбожников верность Христу сохранять призывали есте людей окрест вас сущих, в годину скорбную смут и невзгод людей российских духовно укрепляли есте и милосердными делы вашима вспомоществовали есте и утверждали в хранении истины Христовой, в ней же и нас твердыми пребывати наставите, сего ради во узах суще, от гонителей веры Христовой оскорбления, надругания, заушение и лютыя биения незлобливе прияли есте, молящее Всеблагаго Спасителя о даровании вам в муках терпения и во страдания – укрепления. Мы же зовем вам сице:

Радуйтесь, безбоязненные веры Христовой

проповедницы;
Радуйтесь, мужественные истинного учения
исповедницы;
Радуйтесь, за проповедание веры и жизни своей
не пощадившие;
Радуйтесь, души своя за имя Христово
положившие;
Радуйтесь, благодать предстательства за нас
обретшие;
Радуйтесь, теплотою своею любви ко Господу нас
согревающие;
Радуйтесь, радости нам вечныя благоприятные
ходатаицы;
Радуйтесь, о мире всего мира непрестанно
Господа умоляющие;
Радуйтесь, святые и прехвальныя
преподобномученицы Зосимовския, в вере и
благочестии возрастати нам помогающие!

Кондак 8

Странствие скорбное из благословенной земли
Московския в степи казахстанския кротко
претерпели есте, богоблаженные матери наши,
яко не вняли есте сладостным речениям
лжепророков рая земнаго, и обаче верность
заповедям Евангельским, грядущаго града
Иерусалима Небеснаго взыскуя, вся
помышления твоя к небеси непрестанно
возносили есте, верность Спасителю в час

гонений сохранили есте, и на Крест Господень
взирая воспевали с надеждою, воспевая
Победившему смерть: Аллилуйя!

Икос 8

Всем естеством вашим, о богоносные
преподобномученицы, Христа Спасителя
возлюбили есте, подвигом добрым
подвизавшиеся, веру бодро соблюдшие и
течение свое добре скончавшие, за страдания
вами мужественно претерпенныя, обрели от
Подвигоположника Нашего - Господа Иисуса
Христа - венцы правды. Тем же усердно
поучаящиеся в ваших деяниях, с любовью
поминаем вас – наставниц и заступниц наших,
и желая подражати вере вашей, смиренно
вопием вам сице:

Радуйтесь, Божией благодатю силу устоять в
истине обретшия;

Радуйтесь, во святых молитвах ваших Бога
узревшия;

Радуйтесь, зло мира сего добром победившия;

Радуйтесь, смертью вашею мир умудрившия;

Радуйтесь, жизнь земную свято и праведно
скончавшия;

Радуйтесь, пришедшие от скорбей многих на
покой вечный;

Радуйтесь, восприятие со славою во обитель
святых;

Радуйтесь, увенчанные от Христа венцами
нетленной славы;
Радуйтесь, святые и прехвальныя
преподобномученицы Зосимовския, в вере и
благочестии возрастати нам помогающия!

Кондак 9

Все ангелы Божии, спасенных и святых Божиих
собрания неисчетные на небе торжествуют,
избраннице Божия Афанасие, яко ты
подвижническую жизнь вела еси, подвигами
твоими труды инокинь многих превосходя,
непрестанную молитву пищею для души твоей
имея, изгнание, лишения в дальнем краю с
небесной кротостью претерпела еси и востекла
еси в чертози Царя Небеснаго. Мы же,
прославляя Господа, Дивного во святых Своих,
со слезами благодарности о тебе вопием Ему:
Аллилуиа!

Икос 9

Вития многовещанные не возмогут достойне и
справедливе воспети подвиг жития и служения
вашего, богоблаженные матери Афанасие и
Евдокие, Магдалино и Марие, яко вы возлюбили
есте Христа, последовали есте за Ним путем
крестным, претерпевая всяческия
пренебрежения и надругательства в заточении
темничнем и пути скорбном изгнаний и

лишений, яко смерть лютую в бескрайних степех
евразийстиих притерпели есте и венчание
нетленными диадимами славы вечныя от
Подвигоположника Христа прияли есте. Сего
ради и мы взываем к вам с надеждою на
заступление ваше пред воскресшим Господом:
Радуйтесь, в вере Божественной нас
укрепляющая;
Радуйтесь, надежду спасения верным
утверждающая;
Радуйтесь, любовью Божиею нас согревающая;
Радуйтесь, сомнения наша, яко прах,
развевающая;
Радуйтесь, во уныние падших нас ободряющая;
Радуйтесь, доверие и любовь к Богу
воспламеняющая;
Радуйтесь, сердца злых людей, враждующих
против нас, смягчающая;
Радуйтесь, советы лукавыя и коварство их
разоряющая;
Радуйтесь, святая и прехвальная
преподобномученицы Зосимовския, в вере и
благочестии возрастати нам помогающая!

Кондак 10

Спасительный подвиг твой, и высокие
добродетели терпения и трудолюбия,
прехвальная преподобномученице Марие,
убиение Христа ради претерпевшая, прославляя

ныне же с верою и любовью, молим тя усердно: молися за ны ко Господу Богу, да дух благочестия и веры твоя, благости и милости не оскудевает и в нас немощных и грешных: да будем чада твоя не по имени только, но дела благима и всем житием нашим. Ты же, предстоя престолу Пресвятыя Троицы, не престай моляся о нас, ублажающих тя, купно со всеми новомучениками российскими, да сподобимся небеснаго селения достигнути и гласом радования воспети Богу ангельскую песнь: Аллилуиа!

Икос 10

Стене нерушимей и крепости неприступней подобно заступление ваше, святые Афанасие и Евдокие, Магдалино и Марие, яко вы страждущим духовное утешение, верным о Христе радость и умиление в житии земнем явили есте, яко труды велиеми, попечением о ближних, изгнания тепрением, исповедничеством, и мученичеством всепобедным прославили Распятого за ны Спасителя. Ныне просим вас: озарите наша души сиянием Божия благодати и наставите нас верно исполнять заповеди Христа Бога, ибо ведаем, яко много может молитва ваша пред благостью Его. Сего ради со упованием молитвенно к притекаем и взываем:

Радуйтесь, веру нашу во спасение со Христом укрепляющая;

Радуйтесь, светильницы, мрак душ наших благодатно озаряющая;

Радуйтесь, пути наши заступничеством вашим исправляющая;

Радуйтесь, братолюбием и милосердием нас ущедряющая.

Радуйтесь, мир о Дусе Святе в сердце вселяющая.

Радуйтесь, зависть, клевету, ревность и злопамятство истребляющая.

Радуйтесь, к долготерпению в скорбях и недугах нас приклоняющая;

Радуйтесь, во всяких нам нуждах и обстоятельствах помогающая;

Радуйтесь, святые и прехвальныя преподобномученицы Зосимовския, в вере и благочестии возрастати нам помогающая!

Кондак 11

Пение молебное приносим ти, богоносная преподобномученице Магдалино, благочестивая и богомудрая старице, в пречудном житии твоём образ благочестия, смирения и благодатного богообщения нам даровавшая. Сего ради с несомненною надеждою к тебе, притекаем; почерпающе же от тя воду живую, утоляющую нашу жажду духовную, все наша нечистоты

омывающую и наши горести житейские
улаждающую, Богу, нас спасающему с любовью
вопием: Аллилуиа!

Икос 11

Светоподательныя светильницы, святые матери
наши, во мраке страстей мира просиявшия
благодатию Святаго Духа возженныя, не под
спудом, но на свещнице небесном
поставленныя, и так присно пред престолом
Божиим горящия, всему же миру и нам,
грешным, на земли сущим, светящия, да видяще
добрая дела ваша, прославляем прославившего
вас Господа славы, и к вам от всего сердца
вопием:

Радуйтесь, с Пречистою Девоею Богородицею у
Престола Сына Божия предстоящия;

Радуйтесь, со святыма Зосимою и Василиском
вкупе присно торжествующия;

Радуйтесь, со святителем патриархом Тихоном
хвалу Иисусу воспевающия;

Радуйтесь, о мире и благословении страны
российския умоляющия;

Радуйтесь, со всеми новомучениками Агнца
Божия воспевающия;

Радуйтесь, проповедников евангельской истины
благодатное вдохновение;

Радуйтесь, иерархов Церкви Христовы правило
веры и от скорбей избавление;

Радуйтесь, храмов Божиих усердных строителей и верных в них служителей любовью Христовою обогащение;

Радуйтесь, святые и прехвальныя преподобномученицы Зосимовския, в вере и благочестии возрастати нам помогающия!

Кондак 12

Благодать свыше вам дарованную, святые матери наши, на притекающих к вам в скорбях обильно с любовью источающия помощь благодатную, ибо вы и по успению своем не оставляли есте всех притекающих к вам, сего ради просим вас: не престаните умоляти Христа Бога, яко ныне с Господом во обителях Его почиваете, призирая на нас с высоты небесныя, и приклоняя к нам вышнее милосердие, да Всемилосердный Создатель свободит державу нашу от тлетворных обычаев, от безбожия и нищеты, да спасение тем улучивше, воспоем вами благодееющему нам Богу: Аллилуйя!

Икос 12

Поюще преславное житие ваше, богоносныя Афанасие и Евдокие, Магдалино и Марие, нелицемерныя любве к Богу и ближним преисполненныя, мученическую кончину и славу на небеси и прилежно молим вас: не оставите нас в скорбный час; вымолите пред Богом

благодатный дар покаяния и отымите от нас грешных в Вере спасительней колебания. Вам же от усердия нашего таковые похвалы приносим:

Радуйтесь, лучами благодати Божия осиянные;

Радуйтесь, благоухания духовного преисполненные;

Радуйтесь, Церкви небесной и земной украшение;

Радуйтесь, непорочного девства честный покров и ограждение;

Радуйтесь, упование на вас возлагающих дивные помощницы;

Радуйтесь, о душах наших усердные ко Господу молитвенницы;

Радуйтесь, отчаящихся и падающих умиротворение;

Радуйтесь, о погибающих скорое попечение;

Радуйтесь, святые и прехвальныя преподобномученицы Зосимовския, в вере и благочестии возрастати нам помогающия!

Кондак 13

О богоблаженные матери наши Афанасие и Евдокие, Магдалино и Марие. Воспеваем вам пение похвальное и всеусердно молим вас: испросите у Сладчайшаго Иисуса нам необходимое к житию земному и благочестию, избавите нас от бедственных падений,

бесовских искушений, болезненной печали и Царствия Небеснаго наследницы всех сотворите, да сподобимся вместе с вами и преподобным Зосимою во веки воспевать Всесвятей Единосущней и Нераздельней Троице: Аллилуиа. (Этот Кондак читается трижды. Затем читаются Икос 1 и Кондак 1).



ПОЛНЫЙ АКАФИСТНИК КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

I

НОВОЕ
* НЕБО